

Anár 29.11.2007

Sámekulturguovddáš ovdána áigetávvala mielde

Anárii plánejuvvon Sámekulturguovddášfidnu ovdána áigetávvalis mielde. Sámedikki stivra dohkkehii Senaatti-giddodagain válmmaštallojuvvon kulturguovddážii guoski láigosoahpámuša. Sámediggi lea ođđa guovddáža váldoláigolaš ja dat lea dahkan ovdaláigosoahpámušaid boahktevaš vuolleláigolaččaiguin, mat leat Sámi oahpahusguovddáš, Sámi duodji r.o., Sámi-Soster r.o., Lappi leannaráđdehus ja Anára gieldda girjerájusdoaimma.

Sámediggi lea álggahan fitnu ollašuttimii gullevaš doaimmaid ovttasbarggus Senaatti-giddodagain ja Anára gielddain. Senaatti lea válmmaštallamin arkiteaktagilvvu, man lea mearri álggahit giddat 2008. Ieš plánemii lea dárkkuhus beassat jagi 2009 ja huksen álggahuvvo dálá áigetávvala mielde giddat 2010. Kulturguovddáš galggašii válmmaštuvvat manimustá álgogiđa 2012.

Sámediggi doarju Nuortalašguovddáža áigáioažžuma Čeavetjávraí

Sámediggi čielggada vejolašvuodaid oassálastit plánema vuolde leahkki Nuortalaškultuvra-vođđudusa doaimmami ja Čeavetjávraí plánejuvvon Nuortalašguovddáža áigáioažžumii. Dasa lassin Sámediggi čielggada vejolašvuodaid láigohit plánejuvvon Nuortalašguovddážis doaimmalan-jaid boahtevuodas vejolaččat bálkáhuvvon nuortalašgiela jorgaleaddji várás. Nuortalašgiella ja – kultuvra leat duodalaččat áitatvuolde ja dárbašit viidásit sámeservodaga doarjaga. Sámedikki oassálastinvejolašvuodat plánejuvvon nuortalaččaid kultuvrra, giela ja ealáhusaid doarju doaimmaide leat goittotge gitta Sámedikki iežas stáhtaruhtadeami dilis boahktevaš jagiin. Sámediggi doarju nuortalaččaid kultuvrra bajásdoallami ja ovddideapmái guoskevaš doaimmaid ja Nuortalašguovddáža áigáioažžuma iežas vejolašvuodaid rámain.

Nuortalašguovddáža plánen laktása jagi 2006 álggahuvvon ja Sámemuseavuodđudusa hálddašan Ealáhusat ja nuortalaškultuvra giehtalágaid-prošektii, man ruhtadeaba Lappi Bargo- ja Ealáhusguovddáš (TE-keskus) ja Anára gielda. Fidnoplána mielde Nuortalašguovddáža bajásdoallin ja huksejeadjin vođđuduvvo Nuortalaškultuvravuodđudus, mii hánke dárbašlaš váriid ruovttueatnamis ja olgoriikkain.

Sámedikki gielladoaimmahagas ii doisttázii leat nuortalašgiela jorgaleaddji.

Sámediggi ii dohkket eana- ja meahccedoalloministeriija mearrádusa máksit dušše beali boazodoalu boraspirebuhtádusain

Sámediggi ii dohkket eana- ja meahccedoalloministeriija aiddo dahkan mearrádusa máksit dušše beali boraspiriid álgojagi áigge boazodollui dagahan vaháguin. Sámediggi gáibida, ahte vahágu galget buhtaduvvot fámus leahkki lánkaásahusa mielde dievaslaččat ja dálán.

Eana- ja meahccedoalloministeriija lea spiehkastan ovddit jagiid vuogis ja buhtadan boraspirevaháguid ovttagardásažžan, mii mearkaša dušše beali buhtádusain, man lánkaásahus geatnegahtta máksit. Boraspirevaháguid buhtádeamis addojuvvon lánkaásahusa mielde dievas buhtádus oavvilda bohcco geavatláš árvvu buhtádeami guovttegeardásažžan.

Sámedikki cealkámušas Gálldoavvi meahcceguovllu ja Sámmotjeakki-Vádjotjeahkki jekkiidsuodjalanguovllu dikšun- ja geavahanplánas sáddejuvvo mediai sierra dieđáhus dan manjá go cealkámuš lea čállojuvvon loahpalaš hábmái čoahkkima giedahallama mielde.